

Rossi

I.

Per fin?Amor m?esbaudira
tant qant fai chaut ni s?esfrezis,
toz tems serai vas lei aclis,
mas non puosc saber enqera
si poirai ab joi remaner,
o·m voldra per seu retener
cella, cui mos cors dezira.

II.

Seinhors e dompnas gequiria,
si·l plagues qe eu li servis
e sivals d?aitant m?enrequis
qe dices qe ma domna era;
e del plus fos al seu plazer,
de la menzonja o del ver,
c?ab sol son dig m?enrequira.

III.

Ges tant leu no l?enquezira
s?eu sabes cant grieu s?afranquis;
c?anc res no fo no s?umelis
vas amor, mas ill n?es fera;
en domna non pot ren valer,
per riqueza ni per aver,
se jois d?amor no l'espira.

IV.

Ja de sos pes no·m partira,
si·l plagues ni m?o consentis;
e qui·mrazia m?en partis
faria·m morir des era;
q?en outra non ai mon esper,
nuoit ni jorn ni maitin ni ser,
ni d?als mos cors no consira.

V.

Entre joi remaing et ira
ades qant de leis mi partis,
q?anc pois no la vi q?ela·m dis
qe si l'ames, mi amera.
Alre no sai del sieu voler,
mas ben pot per vertat saber

q?eu morrai si ganre·m tira.

VI.

Gencer en es mon no·s mira,
guai?e blanca coma ermis,
plus fresca qe rosa ni lis:
ren als no m?en desespera.
Dieus! si poirai l?ora vezer,
qu?ieu josta leis puesca jazer!
Eu non, qar vas mi no·s vira.

VII.

Toz mos talenz m?aemplira
ma domna, sol d?un bais m?aizis,
q?en guerrejeira mos vezis,
e·n fora larcs e donera,
e·m fera grazir e temer,
e mos enemics bas chader
e tengra·l meu e·l garnira.

VIII.

E pot ben ma domna saber
qe ja nulz hom de mon poder
de meillor cor no·ill servira.

IX.

E si·m fezes tant de plazer
qe·m laisses pres de si jaser,
ja d?aquest mal non morira.

VI. qu'ieu] Qu'ieu

- letto 686 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/rossi-5>